

Trieste

EL GATO.

«El mio gatìn xe pìcolo e grazioso
E come un putelìn zogatolon;
El xe ladro, el xe furbo, el xe goloso,
E al mondo no ghe xe più gran poltrón!»

Co 'l vedi un can, el xe tuto rabioso,
E pronto 'l sta per darghe zo un sgrafon,
Ma se 'l pol, el la fa de coragioso,
Scendendose in premura in t'un canton!

Coi bacoli, coi sorzi e pantigane,
El xe in guera continua e no 'l se stufa,
Ché a un sorzo 'l ghe sta drio do setimane.

Ma quando 'l ga impignì la panza a ufa,
Sui copi de le case più lontane
El cori co le gate a far barufa.

Da «Falische» di EUGENIO BARISÒN.

DAI „CANTI POPOLARI ISTRIANI“

Raccolti dal *Vidossich*.

Verteneglio.

«No posso, no, cantàr, ché 'l fià me manca,
deme de beber, se volè che canto;
deme de beber, no deme de l'oio,
deme de quella bota che mi voio,
deme de beber, deme de quel puro,
deme de quella bota arente el muro.»